

Aruba tin un rikesa arkeologico hopi grandi den Caribe

Casi full nos isla tin tur sorto di sitio arkeologico

ORANJESTAD – Arkeologo sr. Harold Kelly di e departamento di Investigacion di Museo Arqueologico di Aruba a destaca e balor cu nos pais tin riba tereno di arkeologia den nos region.

Compara cu e otro islanan, Aruba tin un balor arkeologico importante ya cu nos pais ta hopi rico den sitionan arkeologico.

Nos tin den total di 200 sitio cu ta varia for di un par di meter te un area di varios hectarnan na Santa Cruz.

Segun e arkeologo Arubiano, sr. Kelly casi full nos isla tin tur sorto di sitio arkeologico.

Pesey ta importante pa haci un esfuerzo pa cuminsa protege cierto di e sitionan arkeologico aki pa nan bira monumento, pasobra hopi di e sitionan grandi y esun central ta ubica den areanan hopi explota entre otro pa construccion di vivienda.

“Aruba tin un rikesa hopi grandi den e parti pre-ceramico, ceramico, y historico, dor di su localidat cerca di Venezuela y tambe di Colombia”, asina el a declara.

E profesional riba tereno di arkeologia a bisa cu e comunidad Indjan local tabatin un interaccion hopi intenso cu e Caquetionan di Venezuela y tambe cu e indjan Wayuu di Colombia, ya cu nos comunidad indjan tabata forma parti geo-politicamente di e Caquetionan cu tabata situa na Paraguana, Venezuela.

El a splica cu nos Indjanan no tabata los ariba nan mes, y apesar di e frontera di lama cu ta-



Arkeologo sr. Harold Kelly

bata dividi nan, tog nan tabatin un contacto hopi estrecho cu e comunidad indjan di Caquetio di Venezuela.

Igualmente durante un bishita cu nan realisa luna pasa na e comunidad Wayuu di Guajira na Colombia, nan por a ripara cu nan tabatin algun obhetonan cu e caracteristicanan similar di e obhetonan traha pa nos indjan local.

Arkeologo Kelly a laga sa cu pa mundo di arkeologia esaki ta algo hopi importante, pasobra nan tin evidencia cu e interaccion tabata asina estrecho cu tabatin cierto tecnica pa traha ceramica a ser duna over pa e Caiquetionan di Aruba dor di e Wayuunan.

El a manifesta cu pa un cos asina pasa mester tabatin un interaccion hopi intenso entre e comunidad Caquetio di

Aruba cu e comunidad Wayuu di Guajira na Colombia.

El a bisa cu ainda e interaccion aki ta existi keto bay.

Ora cu el a forma parti di e delegacion encabeza pa nos Prome Minister sr. Mike Eman cu a biaha luna pasa pa Colombia,

el a haya hopi great cu e habitantenan di Guajira ta corda di cierto productonan cu nan tabata consumi ora cu nan tabata mucha for di intercambio comercial entre Aruba y e costa Caribe di Colombiano.

“E contacto t’ey ainda.

E ta mucho mas estrecho di locual nos tin pensa for di tempo di Amerindio y den tempo awor ainda”, segun sr. Harold Kelly di Museo Arqueologico di Aruba. □